

## रेखा ढडवाल दे दो गीत

# 1

बोल कुबोल नी बोलणा जी घड़ी दो घड़ी जीणा।  
बुरे दा बुरा नी फोलणा जी घड़ी दो घड़ी जीणा।।

पाए पखेरुआं आल्हणे जी भौंए झक्ख हनेरा।  
कैं: छड्डै कोयल कूकणा जी घड़ी दो घड़ी जीणा।।

नार नी थम्मै फराटियां जी कंद मारै खंधारा।  
कुण दिखै तुस कुरौखियां जी घड़ी दो घड़ी जीणा।।

छड्डां मैं टिकेयां-कैंठेया जी हार नौलक्खा वारा।  
बाहजी पंजेबा भी रुणकणा जी घड़ी दो घड़ी जीणा।।

चढ़ी आया चौई पासैं नेरखा जी मत बट्टा मचूचां।  
खिड़देआं दंदां दा परगड़ा जी घड़ी दो घड़ी जीणा।।



# 2

उच्चियां-उच्चियां धारा जे पुजणा डु:गेआं डु:गेयां डुबणा।  
खुसियां दे मेळे घड़ियां पलां दे सहजैं-सहजैं हस्सणा।।

सर्प सपोळू जंगला च बस्सदे अंगण दुआर नीं सदणे।  
अज ऐ छूहंगे कल छही रहंगे परसूं इन्हां आई डसणा।।

पंख पखेरू संजोई नै रखदे बाज उड़ने नीं उड़दे।  
धरत मिल्ल तां सौ बरी बंदणीं गास मिल्लै तां उड़ना।।

पैरां छेकड़ संगड़ा रस्ता हुंकारा भरी असां हंडेया।  
कैत पाणे एह खुलड़े रस्ते जे सौगी नीं चलणा।।

पीड़ कलेजैं लाई नीं रखणीं अण-बरहआ ए बरनी।  
सुकेआं सुकाआं भळ-भळ बळणा सिनेयां धुखी-धुखी जळणा।।